

Caso Cas pa Hubentud a cay den mal tera cerca pueblo

ORANJESTAD (AAN) — Loke a sosede siman pasa unda Marisol Tromp a dicidi di manda saca muchanan di Cas pa Hubentud a la forsa a cay den masha mal tera cerca trahadornan di dicho instancia y sigur tambe den pueblo pasobra e forma con a actua contra Cas pa Hubentud tabata uno hopi cuestionabel.

Mesun power play cu su colega a haci door di bisa publicamente na un doño di hotel cu e por bien pone hotel riba su lomba y bay cune y si e kier e por basha otro hotel tambe abao y asina crea un mal imagen pa Aruba pa cu tur inversionista internacional, Marisol tambe a mustra power play den caso di Cas pa Hubentud, ta nos ta manda y ta nos ta dicidi pasobra 12 asiento den parlamento y un sosten total di 12 marioneta a crea un dictadura contra pueblo.

Pueblo tabata raso durante dianan cu a pasa pasobra ta con bo por bay bisa publicamente cu bo tin tur aprecio y elogio pa trahadornan di Cas pa Hubentud pero bo mes a dicidi na un forma dictatorial di manda ranca criaturanan inocente cu ya a pasa den momentonan dificil prome cu nan a yega na Cas pa Hubentud unda nan a haya nan di dos hogar anto abo mes ta bay bolbe laga e criaturanan ey pasa den otro trauma?

Ora ministro Marisol ta papia di interes di e

muchanan ta bin na prome lugar e ta kere di por desvia atencion di pueblo for di e hecho cu te na ultimo momento ora nan mes a manda ranca e muchanan for di nan cas cual ta Cas pa Hubentud, ta e ora ey e muchanan a haya di tende kico tabata tumando lugar.

Splicacion di Marisol no a wordo guli door di pueblo y menos door di trahadornan di Cas pa Hubentud kendenan awor bao di capa di un contrato nobo cu Imeldahof ta haya un fastball politico pusha den nan stoma.

Pueblo tabata puntra su mes ta kende tin para den rij pa tuma puesto over di esnan di Cas pa Hubentud pasobra awor cu eleccion ta den porta gobierno ta buscando tur manera pa haya votonan di salvacion pa asina hunto cu Benny Nisbet den banda logra di forma un gobierno unda fiesta por sigui wordo haci cu placa y interes di pueblo.

Den e caso di trahadornan cu tabata haci limpi banda di caminda Marisol a core hunga e wega di bon samaritano door di core duna e trahadornan un contrato di algun luna te fin di aña pasa, pa despues e pusha e problema den scochi di su

colega ministro Wever siendo cu si e tabata un ministro honesto e por a laga tur e trahadornan cu tabata haci limpi banda di caminda sigui traha cu DOW cual departamento ta cay bao di su ministerio.

Trahadornan di Cas pa

Hubentud mester tene bon cuenta cu pronto nan tambe por haya di tende cu 12 parlamentario marioneta lo tira pinda pa nan tambe come mescos cu a pasa cu esnan cu Marisol a termina nan contrato di trabao cu DOW.

Doño di trabao preocupa ya cu e no a yega nunca...

Trahador cu a bay pa atende un curso na Venezuela a desaparece

ORANJESTAD(AAN): — A yega na conocimiento di mesa di redaccion cu recientemente un empleado di un empresa Arubiano a viaha pa Venezuela na unda e lo a atende un curso mas avanza. Segun informe, e trahador lo no a yega na e hotel y tampoco tin informe cu el a atende e curso specializa aki. For di Venezuela, asina informacion ta mustra, lo a manda un notificacion pa esnan cu a manda e empleado. Esaki logicamente a lanta preocupacion tanto cerca su

doño di trabao y tambe su coleganan.

Ultimamente tabatin varios caso na unda viaheronan a pasa den scual na man di malhechornan cu ta aparenta como chofer di taxi, ta laga e pasahero subi auto y na caminda ta asalta nan y ta kita tur nan pertenencianan. No ta conoci si e empleado aki tambe lo por a bira victima di e practica aki pa cual e preocupacion tanto cerca su coleganan y logicamente su doño di trabao. Den transcurso di ayera ainda DIARIO a trata di averigua un que otro pero


te cu anochi laat no tabata tin ningun novedad di e homber.

Tabata dificil pa averigua si el a worde localiza y si el a regresa Aruba sano y salvo y tur DIARIO su esfuerzonan pa haya informe tabata en vano.

Identidad di e empleado ta conoci na mesa di redaccion, pero pa motibonan di etica y pa evita speculacion, lo no revela esaki ainda na lectornan.

Aparentemente autoridad competente ta na altura di e caso y lo ta averiguando di dje via canalnan oficial.

ORDO PA PUEBLO, PROSPERIDAD PA COMPINCHI!!



BEST DEAL


Tel: 5827100

(Pariba di Aruba Bank, Paradera)

BEST SHOPPING DEAL

Turibana Plaza

Tel: 5865455



Radio, C.D.,
Cassette
Afl. 85,=